

Parlament mora pokazati da nije talac uvriježenih interesa

Prvi zamjenik visokog predstavnika Lawrence Butler danas se u Sarajevu sastao sa ministrom civilnih poslova BiH Safetom Halilovićem (SBiH). Oni su, uoči sutrašnjeg zasjedanja Zastupničkog doma Parlamenta BiH, razgovarali o Zakonu o lijekovima i medicinskim sredstvima. U svojstvu ministra civilnih poslova, ministar Halilović je formalni predlagač ovoga Zakona.

“Iako su prednosti ovoga Zakona za domaće proizvođače i potrošače jasne, Parlament se i dalje zbunjeno opire njegovom usvajanju”, rekao je prvi zamjenik Butler . “Ako ovaj Zakon ne bude usvojen, bojim se da bi to investitorima bila samo potvrda mišljenja datog u nedavno objavljenom izvještaju Svjetske banke u kome se navodi da je reforma u BiH posebno podložna lobiranju moćnih interesnih grupa koje nastoje zaštititi svoje tržište. Ovi lobiji očigledno stavljaju sopstveni finansijski interes iznad dobrobiti – a u ovom posebnom slučaju i zdravlja – građana BiH”, naveo je prvi zamjenik visokog predstavnika.

U nedavno objavljenom izvještaju Svjetske banke o korupciji u dvadest devet zemalja u tranziciji Bosna i Hercegovina se nalazi na prvom mjestu na njihovom “indeksu zarobljenih država”, koji se odnosi na neprimjeren uticaj u zakonodavnom procesu. U izvještaju se navodi kako privilegirani, upućeni pojedinci utiču na proces odlučivanja u Parlamentu, čime podrivaju donošenje reformskih zakona, uprkos njihovim evidentnim koristima.

“Ovo je štetno po BiH, i može imati negativan efekat na potencijalne strane investitore”, rekao je prvi zamjenik

Butler . “Najbolji način da Parlament BiH odgovori na to jeste da usvajanjem zakona koji su u skladu sa standardima EU pokaže da Parlament BiH nije talac uvriježenih interesa nego da nastoji uskladiti poslovnu aktivnost i interese svojih građana.

Na vjerovatno posljednjoj sjednici Zastupničkog doma Parlamenta BiH u ovom sazivu, članovi Parlamenta će sutra razmatrati Zakon o lijekovima i medicinskim sredstvima. Ovim Zakonom se nastoji postići da lijekovi budu sigurniji i jeftiniji. On bi trebao da garantira dostupnost visokokvalitetnih lijekova uspostavljanjem jedinstvenih uslova za proizvodnju, testiranje i promet lijekova i mjera za osiguranje kvaliteta, sigurnosti i efikasnosti. Zakon će i samoj državi donijeti koristi uspostavljanjem jedinstvenog tržišta lijekova, nadzora nad njim, uspostavljanjem državnog regulatora te sprečavanjem nelojalne konkurencije.